

海防臆測

下

770
12
2冊

770
12
1941



馬島春三氏寄贈

海防臆測卷之下

其三十一

人之宰事必先審其首尾洞悉其曲折然後可望注
措之協宜若乃黠=黠=不能炳照而任意設施勉
不償事矧戎虜地勢極其荒遐而人情詭幻變動難
測度乎西洋諸國之疆域風尚本邦人絕不之悉如
癡人之說夢然此固其地之遼隔故俗之殊趨以至
此亦吾禁令自使之然也予觀今代所目以才譎幹
蠱之臣者其值盤錯難處之事頗利駿快莫不悉中
窾會至論外夷情形則迂謬舛乖不啻隔靴而爬痒

海方意則



以下凡涉
以斯心區處脩攘大計幾何不至於決裂崩潰也世
有忠蓋敢爲之士不忍坐視其錯亂爲之反復開譬
方且流涕長大息而袞若無聞知可哀也已予謂欲
瀏覽華夷形勢莫如地圖今之握樞軸者夫人揭萬
國全圖稍詳確者於坐側昕夕觀翫問詢諸群下頗
洞知外國概略者以窺遠夷風土之彷彿於是乎見
西洋諸國封域或大於漢唐宋明勝兵百萬紀綱整
飭屹然克自樹立則必知外國之不可侮蔑矣聞西
洋諸國不自安於歐羅巴一州以漸蠶食四大洲服
屬海國諸鳴侵逼支那則自覺外夷之姦狡貪恠真

可惡矣如是可以動其慎畏之心乃人之昌言易入
而謬舉亦漸可革也天幽風七月無逸之圖以儆悟
人主洵良臣之苦心也今以地圖誘迪顯貴人術類
笨淺而其裨補自有不可誣者焉

其三十二

方今大吏重臣間有深惡俄羅斯英機黎之貪狡已
絕不道其政俗及防禦之宜又不喜他人之道之者
是其惡二國則固當至已不敢言且禁人之言則失
得竟如何也夫所惡於西洋諸國者以其懷侵削吞
噬之心也果惡其侵噬當思所以遏絕之之方吾竭

我心思揆時之宜而詳論之又博采輿人之議參證考覈以定防虜之長策方爲得好惡之當故雖韋布之褻賤而丁寧謚之代豫慮外夷之患克審考其國治兵力以資海防之用咸士之有志者也若乃外夷之治忽強弱槩措之膜外吾旣絕不討究又尼人使不得熟議以馴致海防兵備壞隳弗脩異日侵擾之禍有不可勝言者斯與於外夷之甚者也今有罹篤病而酷惡死者富力自攝養其於食色痛警已日不戒乎此則必死不慎乎彼則必死又當其病顛未明告良醫以詢免死之方昉夕交覆以死字切身方可

脫乎死世乃多護疾忌醫甚且譁舉死字袖手無作以冀其自愈者必不可救如秦政嬰疾惡言死事是已嗚呼謀國而甘蹈秦皇之覆轍可鄙之極予將如之何哉

其三十三

泰西歐羅巴列國十餘星羅麻列行三百年而形勢自若也伊須把尼亞俄羅斯英機黎等國相繼淖耳咸有大志專圖侵噬然其所併有類在亞墨利加亞弗利加亞細亞中而不能狼吞於本洲邇年俄羅斯日滋強大始能克波羅尼亞小韃靼以爲已有然其

力洵苦而久矣乃若孛漏生波留杜瓦爾茅那瑪爾加諸國其在歐羅巴中叢乎如邪莒之於齊楚而能嶽然樹立不甚屈伏孛漏生方且與俄羅斯割波羅尼亞而有之雄威可想泰西諸大國吞噬之術施於大而不能於小不行乎邇而翻行乎遐者獨何也蓋亞墨利加亞弗利加諸國地雖濶民雖夥而兵力萎茶不振又况不脩瀕海之備禦敵之防無異於慢藏來盜間有風習犷悍好鬪爭與隣邦殊異者而武備不整飭則與孱夫同歸泰西乘其虛襲其不虞闔國惶駭不知所措手洞然如入無人之域此泰

西所以數_二得志也歐羅巴諸國則不然既已爲隣並之邦彼狼狐之性谿壑之欲與我同調則夙稔知之將卒之勇略相上下武技之精練正相當彼欲來爲難吾固有以待之其不獲逞於此職是故也然則泰西人伎倆亦可知已夫與虜對而輕生侮慢之心固爲不可然虜之智思兵勢則不可不審其所底止不然區處斷不能盡厥宜矣嗚乎以吾邦生齒之衆壤地之肥美士風之勇而尚義苟化導得方海防無瑕隙足以威制外夷而勿之抗迺茫附之不問可勝嘆哉

其三十四

在乎今日脩攘之計必也有威制外夷之形然後可
以得上下奠枕無患有侵伐海南諸嶋之力然後可
以免沿海鈔掠之害此天然之大勢也西人有智慮
者論防禦之方以爲力能經略河南北而淮南可守
淮南防禦完堅而江南可保形勢正相同也烈祖
居平慎靜自守不輕試干弋萬不得已而后從事征
討故論者類以爲使烈祖出于今只當確然固守
飭沿海防禦以絕虜窺伺斷不以進取爲事而務遠
略焉斯論未必中窾也予觀烈祖時海畔晏然無

警非如今日之夷舶數一出沒而烈祖防遏之心
不必弭忘時召和蘭耶揚須諳厄利亞安志諮外
國治忽隆替嘗云吾今爲日本主則不得不以外國
動靜望慮常欲洞知之又嘗使御勘定某與噶蘭人
往南亞墨利加熟察地形風尚其遠圖非庸衆所克
測也烈祖年七十有四始殄攝城餘孽次年違世
未及窮厥經綸可惜已夫明辟所以不輕於進取者
以其或招士民之困悴也至國家安危所關則沛然
果決而行之一勞以貽百代之佚予意使烈祖叟
數十載馭世必當乘百勝之鋒吞滅海南呂宋渤泥

海方臚
等國以張皇本邦之威不瑣。苟自保而已。特不似
豐太閤征韓之舉。無謀強戰死者。如亂麻以貽贖武
之誚耳。

其三十五

兩間建國莫強於韃。今之滿清及莫卧兒都兒格凡
據肥沃富饒之城。肆然稱帝者。舉皆韃種也。夏遼滿
清而前。遼之入中州。金之有天下。一半元之統一。支
那咸屬韃種。韃之憑陵西土。非昉乎清。時清獨盛大
而久耳。韃俗尅鷙耐寒。苦輕戰鬥。視死如生。是以侵
略鄰國如狼之歛羊。勁颺之摧霜。葉歛莫敢櫻我鋒。

奏勲之速。有非人所克測度者。焉惟其悍擴之性。一
意直遂。無所顧避。故足以陷堅挫銳。而艱於持重。遭
彼反覆。十思以耐久。曠日制之者。或為所折伏。又况
人之猛闕者。消其蠱於紅翠。浸漬於奢侈。則迷溺翻
甚於冶蕩。敗檢之輩。元魏金遼之季。可見也已。邇者
莫卧兒兵力弗競。至於國主為俘。都府多見侵奪。都
兒格雖稱強大。較諸二百年前。邈然弗逮。今也。蓋
小韃韃莫爾太波亞等地。羅又兵漸逼近。帝都獨清
距開關不甚久。又世以不忘韃地古俗為戒。故降乎
今。威風未墜。然觀緬甸述略。歐清教匪述編等書。兵

力殊覺綿弱。異日外寇有若拓跋圭完顏阿骨打。內亂有若朱元璋陳友諒李自成。斷不能保天下矣。本邦風習勁而直重義而尚武。韃虜之勇不足懾憚也。而剽悍之資。騰發雷厲。不能忍其久。亦少犯韃虜之矩。在上者克知悉斯懇。論苦使闔天下之人。或能不墜古昔勇鷲之風。而又能遠圖長思。不流躁急之習。則強虜過於宇內。究奚足畏乎。

其三十六

本邦支那政教之體。以使人知廉恥為至重。士民崇廉恥則國家又寧。衆忘尚恥則危。顛立至而西洋諸

國似未必然。斯風尚之。豈不侔也。予觀今代之蘭學。者往。不知恥之為恥。即其人稍以特操行。聞而淫營貪饕。忍為士大夫之所不敢。亦可慨也。或謂蘭學者之。夷詬寡恥。此自其人之譽失。非原于和蘭政俗。是斷不然。乃父報仇。其子必剽劫。世人失道之行。必有淵源。西洋人趨利如鸞鷁之驅雀。百方必獲。然後已。故二國互市於它邦。則必竭譖。妨得其一使。不得通而已。擅其利與鄰邦。締好不啻膠漆之固。彼少有罅隙。直乘之以侵伐。不復顧齊盟。西洋所以富強咸率由斯術。蘭學之源。真可畏也。顧今俗吏役。於期

會賑簿而拋武備於局外拘儒專談三代之英漢唐
之成讎絕不諳今日外夷情形今欲定海防之制以
攘遏外寇非詢諮於蘭學者必不能獲其竅縈也予
於蘭學者節取其長而棄其短不至以貪慚無恥之
施於政其或庶幾乎

其三十七

吾邦巋然雄峙乎巨海中民風醇懿守信尚義在兩
間未見其比西洋諸國間有懷虎狼之志者未必不
欲侵加乎我而我理直義正無瑕可指摘則彼惡然
內辭以使其下而衆咸有龍種瑟縮之氣不肯爲所

用也獨我邦於外國過於畏慎區處動失其中今有
漂外國而歸者視如重犯之徒不許其再航海或禁
錮以畢生夷舶之來去海上者無問其情僞槩待以
侵掠之賊必殄殲然後已夫漂到外國堅請而歸者
咸顧戀本邦其情可憫當厚撫之而加贍恤其或萬
有一二浸淫祇教而欲誘愚俗者當嚴加之刑不可
不判玉石而悉行罪僇也夷舶之出沒海上者不無
挾姦藏慝之輩然當審覆其是非曲直而區處之今
一切以梗邊襲塞之虜視之欲獮薙以自快其心未
必無啣冤者而適自處孱懦怯敵之甚非策之上者



也本邦寬宏之政虓勇之俗萬方所曾仰獨於外虜情實有所猶未曉悉故注措間有刺謬致使外夷目曰我邦爲悍鷲無道之邦夫人思致死乎我是可懼也已

其三十八

西土明季而來憑城禦敵專賴砲銃以奏捷然而其術之精巧似不能尚於我焉船艦之制覺亦遜乎我往歲清商漂來清水湊也予門生某蒙縣令囑護送達崎嶼爾時得諦觀清船之制迥不如本邦所造之攻緞此賈舶耳而戰艦可推也夫船銃海防之大者

清無斯備而能不招侮於外夷者何蓋以其國之形勢有殊也清西北與回二蒙古俄羅斯壤界獨東南瀕海而南又惟廣東一省臨海其他以安南緬甸等國爲藩以自屏蔽東方一帶南自福建北抵青齊爲沿海之境不爲不長然而以清殆方二萬里之大國計之特不過一面受海非如本邦地形狹而長環海以立國也清世以不念武爲大訓海防亦稍修舉不至如明代之全然墮弛固足讐伏海寇而海防止於東方一帶極易於措畫斯清人之至幸也清旣綦其強大附近戎虜咸役屬與西洋所據之地犬牙錯其

威足以震懾之一為清所與怒必不利乎彼故西洋諸國惕息不敢違忤清之免於海寇固自有以也若乃本邦見西土疎於海防而克免於侵擾謂吾亦然以怠於沿海之備是濶物情事理之甚者也

其三十九

泰西人歷選海國之大者躋渤泥為第一麻太加須曷爾居二蘇門答刺在三而擯本邦於第四蘭學者流據以斥本邦之小而驕釋庸俗夫國之強弱盛否非可以大小斷當就風氣之堅脆民庶穀物之多寡以判之若徒地之大是尚則長狄之廣莫勝於晉而

鄭不及宋之強也而為可乎渤泥麻太加須曷爾蘇門答刺諸國大都在赤道前後毒熱異常人之居此者昏潰邈陋蠢如禽獸蟲豸然故其國久已為外夷所蹂躪無足齒數若乃本邦則在北極出地三四十度之間寒暄得中萬彙繁庶聖賢英杰之所產是以風尚規制亾論渤泥諸國為穹淵之懸萬邦亦未見其倫匹乃至戶口之夥其實非吾儕所得與聞然以臆度之應不下五千萬是特較清乾隆之盛則遜耳其於漢唐宋明致隆之際及歐羅巴都兒格俄羅斯目今之強大正相頡頏猗乎昌矣据如此之地足以

海防臚議
雄視百蠻衆狄而勿之確乃來外國慢侮總二然常有侵軼之懼蓋經畫未盡其宜故也如諸厄利亞亦爲海國而邈不及本邦之大又寒涯荒瘠尠生聚而以其志氣卓犖務恢遠略也威稜震疊於五大洲邦人見之亦可以少知愧勵矣

共四十

國雖廓然恢廣而土地寒涯不毛民物不蕃阜則堡塞棄而弗守險要疎而易入岌二焉有侵削之懼國雖曰叢爾之小而戶口夥米粟饒裕則防備可以得周匝進有攘闢之勢退有堅守之使其失得迥爾不

侔也故梁伯廣其國而民不實卒併于秦齊壤地不甚大而生聚繁殖在七國中屹然稱雄固其當也雖然英武之主據曠渺荒莽之國能使守備周到無可抵之隙至昏君孱主則治地狹民殷之域直覺四封空疎多暇可乘譬之佻儻之倫居家或不能馭一二賊獲而明略邁匹者乃將十萬之師能使之如臂指之使左右伸縮無不如意人之智否懸甚迺至此今清地十倍乎我而人口不過萬二俄羅斯地數十倍乎我而人口止於五千萬此地與人相參較則亦可謂廣莫少民然二國防備卽未得周密無漏闕而亦

海防臚議
稍整設有以自固不無可稱若乃地居彼十之一二
口數與彼略敵衡實爲兩間富庶殷阜之區而沿海
守備或不如二國之稍有以保境威敵則其爲可恥
熟甚焉

其四十一

目今論者類以爲本邦之環以海而無隣並之國實
幸之至也藉令如西土與南夷西戎北胡接壤則久
已爲虜所吞滅矣此識一而不知二之見也西土如
燕魏遼金割天下之半元清保有天下之全皆自附
塞小夷起浸二蠶食馴致滔天之禍因以爲本邦無

是隣近之夷故能免於禍焉然而西土所以罹燕魏
遼金元清之難者以其君臣荒淫政厯民散有必敗
之兆也國有必敗之兆不思更張釐正以自強而徒
冀敵之不來以獲倖免洵屬無策矧國勢至此凡
萌隸寇賊咸足篡竊神器寧獨戎虜之禍而已也哉
且也近歲強胡如鄂羅斯如英機黎船艦牢而鉅極
長於水戰雖千里而外轉輿可達則吾邦猶之隣比
然乃欲以千載前專恃騎戰之虜待之膠柱極矣夫
本邦所以不遭外夷之患者特以振古而還國勢雄
兵力壯大饒於智勇巍然有以自立故寇賊畏避不

敢萌覬覦耳不然如瓜哇呂宋蘇門答刺諸國皆峙于巨海中與本邦無異而悉爲泰西所蹂躪無克自存環海之國焉足恃乎試使本邦在支那印度地乎以邦俗之虓鷲夏得如烈祖及豐太閤之英武而駕馭之以展其宏略可以吞併鄰邦突過清之大而虎視於五大洲豈不快之甚邪乃以四面臨海不甚便於進退也蕭然有退縮之勢不復思兼并予未見其爲幸也今上下果能一意惕勵嚴武備飭海防進可以挫敵退足以自保若乃恃環海之阻晏然忘戰怠佚侈靡湛溺昇平之樂以來強虜侵侮異日之

禍深可憂慮則世之所謂至幸祗爲大不幸可勝嘆
謂哉

其四十二

古昔甲之武田晴信越之上杉輝虎胥長於行師兵精而國強不可與確織田信長稔知之卑辭腆禮以奉承其意使不獲造釁端以其間吞噬京畿及鄰近諸侯意欲待已國綦大兵至強二師子立無援然後一征殲之後來甲遂爲信長所併輝虎雖覺信長之狡計而未幾病殘不堪有之制嗣子遂爲所削弱信長之遠圖亦可畏矣今俄羅斯英機黎之設心頗似

類焉姑舍其強大者而先從事于小弱易與者故五大洲中國凡習脆軟忘武者多彼併有而其強者則依然屹立不相下彼其志豈盡守此亦欲混壹衆弱極其盛大之勢以困蹙向之強者亦可惡而畏今也彼經營慘淡未逞其志之際正屬我有爲之秋不迫今之遐豫而爲之所後必有不可悔者矣雖然卽稱絕大莫強之邦兵力自有涯限非可輕興數十萬之師有國焉人口苟躋四五百萬可以發十萬兵加之措畫合宜外夷無復可畏此又異於甲越之小四隣皆爲敵則孤立難保者天下與一國其形勢固不侔

矣嗚呼如本邦其盛大富實幾無遺憾特恨其未盡扞禦之術不能有以威制四夷耳

其四十三

目今外國除滿清都兒格之外莫盛且大於俄羅斯英機黎凡兩間綦強極熾之國爲本邦爲滿清爲莫卧爾爲百兒西亞爲都兒格而朝鮮喀爾喀翁加里亞等次之以西土里里程計之綿地殆四萬里許而其北則俄羅斯止以一國承之其形如鼇之戴山而杯然今又滅波羅尼亞削奪雪際亞之半其西界更出於都兒格之西取東察加渡海而漸蚕食亞墨利加

則其東陲遠迤於本邦之東其大爲何如也俄羅斯
強國固多凜冽不毛之地然併有旣極其廣則其中
亦有沃腴之區如新舊都近地及歌撒曼波羅尼亞
未始不殷富故舊志其口三千萬近歲之史則云五
千萬其勢駸二有不可禦者卽就今日而論幅員之
大亞古靡匹而其人口之夥又足敵漢唐之盛際那
可輕邪或云渠夙有吞併一世界之心此雖出於臆
測之說而方今之盛旣已爲騎虎破竹之勢其大志
未必不存乎方寸不可不懼也論本邦如夫滿清百
兒西亞都兒格胥拋之度外而不盡折衝之方則非

晰時務者也邇者英機黎侵略海南諸島據榜葛刺
削噬天竺又大深入北亞墨利加自其極東而透出
極西殆有一大洲之半勃興之勢不可遏然未悉其
詳故不論要之二國尤外國之可畏惡者也

其四十四

論者或曰俄羅斯國勢日滋熾大而貪恠無紀極未
必不欲侵加乎我幸哉其未知出乎上計也藉令彼
移帝都于烏都加漸侵逼我以行蠶食之術則雖
有智士無奈之何也已世人類篤信斯說其實未燭
外國形勢也今所懼於俄羅斯移都者以其富庶之

地密邇我也蓋謂如此則大兵發糧餉易繼而我北
陞防備濶疎無以待之其禍難測也夫於烏都加地
方沍寒窮匱百物不殖究非定帝都之域果使彼傾
國以未斯地之殷阜徒有傷財憊民而不見顯効彼
必弗爲也泰西間布凜列之鄉焉繫泊之地極其蕃
庶者特以其萬國互市輻湊故克致昌阜也今於烏
都加傍近未聞有大國可市易者則將何以能得殷
盛乎且俄羅斯志願綦鉅將以經營四海方今兵強
地廣如滿清都兒格百兒西亞漢又利亞拂蘭察等
數國皆接近俄羅斯而森然列峙彼所畏忌而警備

者職在乎茲彼之貪饕不可謂於我無窺伺之心然
非有積怨蓄怒斷不至不顧國力不圖利害冒死以
先攻我可知俄羅斯決不出移都之下策也設令彼
慙移都以經營東方乎本國遺守乏人兵衛單弱隣
近大國必將伺隙以求逞則俄羅斯新舊兩都岌岌
焉危矣昔楚靈次于乾谿以逼吳而三公子潛入內
訶于郢王遂縊死金逆亮遷都于汴將困蹙宋而燕
京夏立君身尋遭弑是在俄羅斯洵爲失策之尤而
適爲我之幸俄羅斯之愚寧至此邪今之俗吏拘儒
固絕不諳海外情形其稍留意於邊防者立論之舛

亦復若此可慨也已

其四十五

今代議海防之方者其待泰西之目有二曰彼來請互市斷然不許以巨砲逆摧其船艦使不得嚮邇也曰姑許其請待以禮撫以恩使之不得造釁端也而大吏則多左祖嚴禁互市之策焉夫絕互市而擊摧船艦者峻烈之極允其互市而以恩信綏懷之者一於仁柔二論殆如東西冰炭之相反而其心則未始相背馳何也戎虜豺狼之性饕餮之欲惟利是競不顧信與義吾洞視其肺肝則夫峻拒互市而極力擊

之固不爲過當也顧戰非仁人所好萬二不獲已然後用之且也今日海防之未固卒伍之未素習難以應勁敵故不如於戎虜播恩施信使彼無辭以始鬪闐彼猶頑乎猖獗不肯馴伏乎我遂至交鋒鏑則彼師出無名而我將卒夫人愾敵不義勇力倍蕪而我武備亦漸脩整斯可以奏捷然則張主許互市布恩信之說者其心全然齏粉虜艦之見特其經畫加周密耳若乃與虜媾和悅其辭之甘貢獻之重晏然自寧不復事防禦以自致陷危如夫差之於勾踐王陵之於石勒真愚蠢之極唱施恩信之說者未始慮不

及此也今夫小人姦狡凶險綦可戮吾能炳察其禍心而其待之則當煦嫗寬綽不至爲怨府斯爲得撫御之妙若乃明告之曰汝真小人吾爾後誓不與汝周旋又且鉗制之蹂躪之使無地自容則渠忿與抗逆不貽毒于我不止此東漢趙宋諸君子所以見踣於群小也今之待虜能勿蹈漢宋諸賢之覆轍則庶幾矣

其四十六

吾之於胡羯苟不諳其情形則注措必不中窾吾行之以爲斯足威敵而翻來敵之侮蔑吾施之謂虜必

感我之德而祇招虜憎怨可謂也已本邦待戎虜原於威武出績密威武俗之美績密政之懿宜措於事而收顯效乃反來彼笑侮則不悉虜之情而漫施於行故也數十載前俄羅斯人發船送還本邦漂民抵松前朝廷傳命北道諸侯發軍防備於是大出舟師圍羅叉船數重夷人見之憤甚日登舷詬罵而其言兇黠侏離不可曉故邦人不知其何所道不復苛禁彼以爲吾萬里護送邦人以厚意來而汝視我如寇敵四面圍守不止不知禮節而何其孱也曩者波留杜瓦爾估客來貿易於我國都一人讎直不當頗有

海防臆測
朝沒估客大怒向王城放大砲國人夷然不動馳一小吏研詰曲在都人乃譴罰之而彼此晏然我邦遭斯鉅變不少遑擾今汝若此其怯懦無乃甚乎夫邦人之圍守虜船所以耀威稜備豫無虞而徒招彼之陵蔑焉今論海防者大都以爲虜之心情難測其來無間請互市求薪水與否槩以大礮破摧之斯爲得防禦之要是論之失得竟何如也彼必云天下至理犯罪當罰無辜當寬赦今不啻其罪之有無苟見外國船艦輒總一警怖遽施屠害之術其不武甚矣邦人大砲擊船之舉欲以遏虜鋒而抵納其侮此亦圍

守夷船之類也顧無事警備之日震耀威武有瞰人之勢而遭醜虜之跳梁不免折北之羞如丁卯之役是已彼之譏侮亦有自取之理焉昔禹入倮國而倮以從其俗彼以倮爲禮而吾以冠裳泄之彼必駭恠以爲忘禮之甚何者拂其風習也矧今吾所以待胡羯未盡措畫之宜彼之所論未爲全無當則因仍釐革之方在上者不可不十思也

其四十七

泰西史乘有云新世界南北亞墨利加洲人口不過三千萬洲之大殆五六倍於歐羅巴而人口如斯之

歷二亦可怪也予嘗考覈厥所由乃泰西人之流毒致然也二百歲前伊須把尼亞首侵亞墨利加吞滅孛露墨是可等大國嗣後泰西諸國競來削奪以爲已有適者英機黎勢燄最盛殆取北亞墨利加之半其所占據且自海東畔連西畔彼其討擊之際砲銃之所紛壘兵燹之所焚燬死傷不知累幾千萬况復泰西往二俘其人以歸爲孛而供使之又且以亞弗利加洲地莽曠少生聚也繫其人以往壘關之離散死喪之多方所以致黎氓大衰滅也夫以浩二一大洲而壤地則任敵分裂而莫之 烝庶則恣敵芟薙

屠戮而不能卹繇地數萬里中幾至無自立之國然則君何爲而立乎上臣何所用而掌厥職可醜之甚也雖然亞墨利加從不產聖賢俊杰其至此固耳如亞細亞自古大聖大英雄林二輩出而海南諸國印度榜葛刺等地類爲泰西所據有而莫之克復斯其可恥更在亞墨利加下矣

其四十八

志云明其爲賊敵乃可服是語啟宋代之孱怯則得矣難以施于今日也宋高宗父兄爲俘喪天下之半金爲不共戴天之仇而宋之兵力亦足以有大作乃

稱臣稱姪一意承順惟恐不及視仇如君認賊爲親不復知天下有羞恥使斯時能聲大義明以金之罪告諭臣民則誠意之咸孚士氣猛奮可以樹恢復之基矣今議者多欲不許泰西互市若有強請者命沿海直以大砲破碎之使人知夷虜不可親近其見固亦有所祖然夷人雖姦狡其獲罪未至如金之於宗特以其不諳本邦大禁而強請互市爲辜耳乃視爲涉血之大仇不足以振士民之勇而翻使人議我注措爲峻暴今令之嚴若此而瀕海漁人乃多潛與還往者蓋未知夷人之酷可惡而猶以上戒令爲非

宋

至當也故不如外布寬大之令而內嚴沿海之備虜之來諭以禮辭必遭懷入寇之志者然後大煩斃之斯爲大國之舉動矣至待虜之方則當務使民不以邈遠而心疾之彼其狼貪虎殘無有盈饜侵削五大洲漸邇支那本邦其可畏惡爲何如也今諸侯守令時二以斯意曉告士民使朝野都鄙瞭然皆悉泰西信可忿疾此所以導民心而使一其於海防裨益洵弘多較夫徒以威令革民面者固不可同日而論也

其四十九

有萬鎰之玉乎此瑩徹焜耀朗然無微類則人奉之

謹持惟恐有墜失若乃嘗經拋擲委隳瑕玷無數日有所毀壞則人殊薄護惜之意此雖類於私而實至理之所當然也今也兩間之建國林=矣其小而弱者不遑縷數如支那如天竺如百兒西亞如俄羅斯幅員萬里而上固稱盛大之邦然逖稽其往事或為賊臣所逆篡或為強藩所取而代或為外夷所入而吞併甚且有戎虜吞滅之變至于斯于三于四五者其為毀玷之璧也多矣本邦不惟士風之彪勇民性之純厯度越萬邦神武而降閱二千五百禩而未始遭戎虜竊據之變未嘗罹姦臣悍藩篡奪之禍百王

一姓繇=弗絕與天地日月比其悠久實五大洲中所未嘗前聞非無瑕之王而何也故在他邦則姦臣之闕于黜虜之入帝數=經觀人覩為常然勢難於遏絕而君臣所以保守祖業自有未極其寅畏慎密者焉本邦承百王一姓之丕基繼述之情自然兢=而惕=即逆臣悍虜篡神器之禍人以為亘古絕無之辜則防遏自有其道而不甚難也雖然恃其易則難必至他邦未遭姦臣強胡之禍之前孰不云百代一姓不易既罹斯禍則弊竇一開蕩然不可挽回故本邦不可不迨今而豫畫桑土綢繆之方也本邦風

習之懿賊臣悍藩之禍萬可保其無可慮者獨戎虜耳今欲承保金厓而無玷缺莫如飭武備務鼓勵士氣使不流於佚惰整理兵備於沿海之防最加周密以豫杜外夷之覬覦是免視國家不如王之謂矣

其五十

昔晉封成師於曲沃曲沃大於晉都翼遂滅翼而代之衛以蒲戚與孫寧而踰制耦國果逐獻公而擅其國尾大難掉末重本顛必至之理也泰西諸邦貪饕之慾可謂熾矣蠶食鄰邦拓開境宇猶未足逞其志方且遣舟師遠經略亞墨利加洲既奪其地使守令

往鎮之於是乎其地或大於本國黎氓或夥多於本國又况彼皆芟薙屠醢之餘恨深次骨勢必回戈反噬以快其忿邇者繹駿弗靖迄於客歲陸梁頗甚英機黎守土之吏不能平殄請援於本國其亂之大可想已夫叔世人衆勝天之日長天定勝人之日短泰西人極巧於取人國則新世界異日之動靜洵有難臆料者若以今古定理推覈之則嗣後新世界畔亂數一起以與本國抗或且陵暴之實勢之所必至而適本邦之幸也邇日土豪與守兵百戰智力困弊必競來乞我應援我大艦無闕火器精練乘其釁以電

海防臚
擊恢本邦之幅員挫悍虜之鋒鏃是亦千載一會而
兵備無素難以應卒此韓熙載所以搯腕於南唐不
能乘中原擾攘艱危之時以致混壹之業也

其五十一

志云偏聽生姦獨任成亂人家侗愿之僕謹敷之婢
偏信之使專管家政或致有榮惑滯縱之失矧戎虜
之桀黠乎本邦自古與支那交通支那雖大邦而其
弁陋最乎六大洲專誇詡一國視他邦與禽獸蟲豸
無異觀於其評本邦政俗一失實而昭一矣是支
那於參替外國情形未始有少裨故必託航海是事

之國然後外邦動靜可晰也祖宗而來許和蘭互市
歲入貢實供告密之用得因以周知外邦興替治
忽洵有補於國家 祖宗之遠圖可崇仰也已顧和
蘭雖不至西土之多譎詐而其貪饕則又倍蓰於西
人故事不關於失得則猶能正言無回避而利害與
已國干涉則遮蔽彩飭無所不至焉可偏信斯一國
以爲確據邪慶長年間國勢熾武威懾於殊域下時
外夷朝貢者二十餘國競自輸情以要親媚乎我後
來國家法紀寢整肅又增遠邪教之蠹是以入貢者
益尠然寬永中猶存和蘭英機黎兩國嗣後英機黎

以互市鮮利故不來者數年遂絕不許然後和蘭獨擅互市之利以迄于今茲二百載如一日也夫互市止於一國則雖有誕譎無根之言其痕跡無自而露若別有一國入貢則迭相點檢欲以扶擿其瑕故不得少有欺瞞固其當耳今和蘭外更許一二國互市則彼爭呈確實之言外國情形且瞭然乎心目亦可資防禦之策顧其國則擇於外夷盛強克獨立而知遵守信義者焉可也此洵目今至要務而人或未之悟可惜也

其五十二

和蘭入貢互市閱二百有餘禩之久世人目以為衆夷中獨和蘭事本邦忠赤無二可恃賴此未得為確見也泰西俗惟利是競不顧理義和蘭亦泰西一國未嘗殊異於他邦吾於彼非有繼絕存亾之大造豈能保其必感戴恩德邪和蘭之初互市在天慶之際實本邦威武綦盛之秋而彼之富強亦適丁斯時侵略海南諸嶋多奪伊須把尼亞波爾杜瓦爾商館而勲烈之偉最在取瓜哇一國彼之貪恠姦狡與羅叉英機黎奚擇但其國不廣兵勢不甚雄故不能肆兵吞噬耳藉令本邦爾時有怯孱可侮之釁必首中彼

海防臚
之毒乃本邦風習之剛武夙甲於萬國加旃當日百
戰之餘始致寧謐上有英辟下多梟將士氣虓闕國
力充裕絕無瑕可乘彼窺覬而讐慄於是乎幡然
易慮一意恭頌以求媚於我因命使爲我間諜時二
以外國消息上聞以資邊防島原之役且至出舟師
發大煩以助官軍聲勢殆如本邦屏翰之國然彼入
貢而來互市之利賜賚之優厚固足以得其歡心而
其所以致彼心服之本則由我威武之奮揚是我所
以能奴使和蘭者在我而不在彼世乃妄以爲彼俗
風尚誠慤效忠蓋乎我惑之極也然把爾杜尾爾伊

須把尼亞先和蘭互市於本邦見本邦之昌大不知
崇畏方且挾虎狼之心圖肆吞噬遂大獲罪乎我焚
棄其大艦絕其入貢與和蘭行事炭冰相反就此以
觀和蘭智慮亦自有度越泰西諸國者焉顧今日本
邦兵力不逮天慶之盛不足以懾伏外國而和蘭亦
日滋衰茶不振豈能生患乎我惟其國勢之不及昔
也間諜之用屏翰之力頗薄是則可慨也已

其五十三

印度至大綦盛之國兵衆材力較諸支那有過無不
及但其地富厚蕃庶百物不匱土沃而民佚不自覺

海防臚
流於脆靡故莫卧兒以蒙古餘孽奮於北方撒馬兒
罕之地以明建文年中深入印度立滅四天竺獨南
天竺纔能自保迄嘉靖中亦為所併莫卧兒之南入
印度也一變印度孱怯之風為猛賁虓鷲之俗其鋒
不可櫻未幾歲而復倥然亦縣弱元文中大摧破於
百兒西亞多喪城邑帝遂為俘土地琛貨陸續充貢
纔而得釋還國降於近歲南方瀕海之地率為西洋
所據英機黎既併榜葛刺漸蠶食印度莫卧兒殆至
海畔無尺地之有其弱可想莫卧兒之所以至於斯
削弱者固緣其浸漬天竺柔軟之俗而其拋海防水

戰於局外不以介意實為之病源也印度據海山之
阻擅魚鹽之利國富民夥苟海防整設無忘武事足
以威制海南諸夷而攘遏泰西乃今也沿海咸為敵
所奪殆如關其口而搯其咽喉然後印度失厥富強
之資而仰鼻息乎彼駸乎有剝膚推髓之勢亦可
憫矣借令莫卧兒有為之主出必先逐泰西諸夷復
臨海地然後始可以自強不然仍今之形勢無改今
之疆域斷不能有樹立終歸於淪亾而已是亦在于
本邦前車之可鑒者也

其五十四

支那之於印度雖曰隔絕之邦而實相為唇齒就今日形勢為清謀乎必併印度然後始免於枘隄之患也清雖強大其蠶食隣邦之術猶迥遜泰西之巧清既殲準噶爾據業爾羗地殆接印度之脊印度衰茶已極而中間無攔截我師之虜使清乘兵力之猛熾以直蒞印度則彼斷不能抗我惟有奉版圖以乞降耳取印度而嚴其沿海之備守其陸路之衝要以綏懷西南夷可以威覃四海乃舍而不問致泰西人肆意占据瀕海地以漸侵削五天竺坐失可乘之會此識者所為深惜也若更任泰西之狼貪使之盡吞印

度憑據安日河東西以攻逼支那其禍有不可言者焉藉使東夷西戎各自為一邦而各自作梗其患未必甚深今乃使泰西人迭相掎角以出乎東西夾攻之計則清將殆不可支今清縱不能蕩平印度果能取榜葛刺及清竺中間諸小夷亦足以自強而清人知慮絕不之及可謂國無其人矣異日清或為泰西保有則禍毒直中乎我其貽患有不可涯量者今吾吞噬印度之策固為清謀而實亦為本邦謀也

其五十五

明大成二祖天資酷忍翦屠臣民而子孫昌衍傳祚

海防臚
三百年唐明皇宋徽宗慈惠寬厚不嗜殺而安祿山
完顏旻稱兵猾夏士庶死於兵者數百千萬國祚幾
絕纜續而其亾實兆于茲夫原人情而論則親下手
殺人與不能禁他人殺人者邈然殊科明二祖親下
手者也唐明宋徽不能禁人殺者也其罪之輕重灼
然而禍福如斯之懸絕後世智誑愚強虐弱每多人
衆勝天之患強秦之得志亦莫足怪而其中自有天
道存焉夫處人牧之任以悍護生靈令脫患苦爲職
吾不能庇之而使勅敵悍虜衝行無所顧憚億兆黔
黎死於鋒鏑於水火與親殺之一間耳且也暴君乘

怒而殺人其殺人亦自有限凶賊醜虜蹂躪天下其
死者不啻倍蓰什佰之多其陷人於死益衆而其獲
罪於天益深瓊二小仁細謹不足以贖莫大之愆也
明二祖慘虐之罪固可惡然而克振中州之威以攘
逐四夷使之厥角懾伏不敢擾邊薄海烝庶獲各樂
其生其功匪小實人情之所歸主抑亦天心之所眷
佑也近代如墨是可孛露及瓜哇呂宋滿刺加忽魯
謨斯咸爲泰西所吞滅彼其君未必有淫虐厲民之
辜而不能飭兵備振作士氣以遏黠虜之侵軼可謂
辱君國子民之道其忽諸也固耳夫明二祖之無道

海防議
當痛戒以爲殷鑒而其摧破戎虜以寧中州之勲洵可則效若乃不識講武練兵以攘寇虜之爲要務徒好敷小惠煦撫柔細民自謂可以邀天眷則處心之謬甚者也

其五十六

本邦四面臨海虜艦無處不可處而北陸最可憂慮何也俄羅斯東察加之地頗密邇而蝦夷之地曠邈荒寂守備單寡所以可懼也東察加沍寒不毛之地極難於蕃殖今也生口無幾彼有狡盜斷不能發大帥以加乎我惟其吾防備之濶疎彼數以士卒侵

擾亦足致國憊耗且彼百方經營求斯地之阜昌方大通新世界互市則漸致繁夥以陵逼我不可知此異日之憂也不獨茲也近歲英機黎日滋盛強以漸蠶食北亞墨利加將自東一貫而達乎西西則與吾東北諸州對岸相距不甚遠而此地漸近南稍饒沃多生聚與東察加之荒瘠不同若英機黎占據此地築固城屯精卒時鈔略東北徼塞則其患尤不測其可憂更甚於東察加矣宜迨今日之尚間暇亟有經畫必也沿海之地皆嚴防禦而蝦夷之地更加周密方爲得其宜雖然方今以叢爾一小侯轄蝦夷莽

渺之地使之守備無曠實屬事之綦艱是良相碩輔之所當十思者也

海防臆測卷之下

